

三台縣志卷十六

職官志二

宦績

後漢

劉寵〔華陽國志〕劉寵字世信綿竹人也出自孤微以明公羊春秋上計闕下見除成都令政教肅明時諸縣多難治乃換寵爲郫令又換郫安漢皆垂績還在成都遷牂牁太守初乘一馬之官布衣疏食儉以爲教居郡九年乘之而還吏人爲之立銘王商陳實當世貴士皆與爲友讚曰超類拔萃實爲世信

蜀漢

常播〔三國志楊戲傳〕常播字文平蜀郡江原人也仕縣主簿功曹

三台縣志

卷十六

一

三台新民印刷公司代印

縣長廣都朱游建興十五年中被上官誣劾以逋沒官穀當論重罪播詣獄訟爭身受數千杖肌膚刻爛毒痛慘至更歷三獄幽閉二年有餘每將考掠吏先驗問播不答言但急行罰無所多問辭終不撓事遂分明長免刑戮時唯主簿楊玩亦證明其事與播辭同衆咸嘉播忘身爲君節義抗烈舉孝廉除郫長年五十餘卒書於舊德傳後縣令穎川趙敦圖其像贊頌之

陳寵〔舊縣志〕寵爲廣漢郡太守辟王渙爲功曹當機善斷不避豪強郡大治帝問寵曰在郡何以爲理對曰臣任功曹王渙

唐

竇兢〔新唐書〕兢字思慎舉明經調郫令修郵舍道路設冠婚喪紀法百姓德之

夏侯端 〔新唐書忠義本傳〕夏侯端壽春人高祖微時與相友李密之降關中地未有所屬端請假節招諭乃拜大將軍爲河南道招慰使會亳汴二州降王世充道塞無所歸糧盡衆潰世充遣人招之不肯往間道走宜陽歷峭巖榛莽比到其下僅有在者皆體髮癯焦人不堪視端入謁自謝無功不及危困狀帝憫之拜祕書監出爲梓州刺史散祿稟周孤窮不爲子孫計貞觀元年卒

李叔明 〔新唐書本傳〕李叔明字晉閬州新政人累遷京兆尹崔旰擾成都出爲邛州刺史旰入朝卽拜東川節度使遂州刺史徙治梓州東川承兵盜彫破叔明撫接有方華裔遂安

蘇榮 〔舊縣志〕蘇榮宰相味道之父爲梓州參軍鄉人皆稱之味道蘇

傳無其人然通志職官類亦列有名姑錄之

三台縣志

卷十六

二

三台新民印刷公司代印

高崇文 〔新唐書本傳〕高崇文貞元中從韓全義鎮長武城治軍有聲遷長武城都知兵馬使劉闢反宰相杜黃裳薦其才詔左神策行營節度使俾統兵討闢乃西自閬中出卻劍門兵解梓潼之圍賊將邢泚退守梓州詔拜崇文東川節度使初闢陷東川執節度使李康不殺至是歸康以匄雪崇文數康失守罪斬之鹿頭山破賊二萬於城下凡八戰皆捷仇良輔舉鹿頭城二萬衆降遂趣成都闢走追擒之檻送京師進檢校司空西川節度副大使南平郡王刻石記功於鹿頭山

盧坦 〔新唐書本傳〕盧坦字保衡洛陽人遷戶部侍郎判度支河毀西受降城宰相李吉甫議徙天德坦以爲非便吉甫不悅出坦爲東川節度使初坦與宰相李絳議多協絳藉爲已助出半歲而絳罷治東川盡蠲山澤鹽井榷率之籍

王 涯 「新唐書本傳」王涯字廣津文有雅思元貞元和間訓詁溫麗多所藁定拜中書侍郎同中書門下平章事穆宗立出爲劍南東川節度使時吐蕃寇邊西北騷然又畧雅州涯調兵拒之上言蜀有兩道直擣賊腹一繇龍川清川以抵松州一繇綿州威蕃柵抵棲鷄城皆虜險要地臣願不愛金帛使信臣持節與北虜約曰能發兵深入者殺某人取某地受某賞開懷以示之所以要約諄熟異它日者則匈奴之銳可出西戎之力衰矣帝不報

李 絳 「舊縣志」絳節度東川恩威並行吏民畏服

郭 釗 「新唐書郭子儀傳」敬宗立拜郭釗兵部尙書又帥劍南東川太和中南蠻寇蜀取成都外郭杜元穎不能禦詔釗兼領西川節度未行蠻衆已畧梓州州兵寡不可用釗貽書譙蠻首箠巔以侵叛意箠巔

三 台 縣 志

卷十六

三

三台新民印刷公司代印

曰元穎不自守數侵吾圉我以是報乃與釗修好約無相犯天子嘉之
馮 宿 「新唐書本傳」馮宿字拱之婺州東陽人貞元中擢進士第拜河南尹歷工部刑部二侍郎修格後敕三十篇行於時累封長樂縣公擢東川節度使完城郭增兵械十餘萬詔分餘甲賜黔巫道涪水數壞民廬舍宿修利坊庸一方便賴

盧宏宣 「新唐書循吏本傳」盧宏宣字子章元和中擢進士第開成中遷京兆尹刑部侍郎拜劍南東川節度使時歲饑盜贅結酋豪自王僞署官吏發敖廡招亡命聯蓬瀛嘉榮諸州誅蠻落搖亂根株盤熾宏宣下檄脅諭賊黨稍降其黠强者署軍中孱無能還之農魁長逃入峽中吏捕誅之徙義武節度使宏宣性寬厚政目簡省人便安之然犯者不甚貸

李休烈 〔新唐書循吏李素立傳〕李素立趙州高邑人孫至遠至遠父休烈亦有文終鄴今年四十九世歎其父子材不盡云

柳仲郢 〔新唐書柳公綽傳〕子仲郢字諭蒙授河南尹以寬惠爲政或言不類京兆時答曰輦轂之下先彈壓郡邑之治本惠養烏可類乎擢劍南東川節度使大吏邊章簡挾勢肆貪前帥不能制仲郢因事殺之官下肅然居五年召爲吏部侍郎俄遷兵部領鹽鐵轉運使

李商隱 〔舊縣志〕商隱字義山懷州河內人第進士大中七年東川節度使柳仲郢辟爲節度判官檢校工部員外郎在東川最久於政事多所贊畫一切箋奏咸出其手

高仁厚 〔新唐書本傳〕高仁厚亡其系出初事陳敬瑄爲營使邛州賊阡能衆數萬畧諸縣列壁數十涪州刺史韓秀昇亂峽中韓求反蜀州

三台縣志

卷十六

四

三台新民印刷公司代印

諸將不能定敬瑄詔仁厚使督兵四討仁厚破阡能軍斬韓求還天子御樓勞軍授仁厚檢校尚書左僕射眉州刺史敬瑄與仁厚謀曰秀昇未禽貢輸梗奪百官乏俸民不鹽食公能破賊當以東川待公仁厚許之詔拜行軍司馬東川節度使楊師立聞敬瑄以仁厚代己有望言敬瑄諷帝詔師立以本官兼尚書右僕射師立益怒移檄言敬瑄十罪殺監軍田繪屯涪城遣兵攻綿州帝乃下詔削官爵敬瑄卽表仁厚爲東川節度留後率兵討之師立自督士十戰皆北仁厚約城中斬首惡者賞師立將鄭君雄諱於衆曰天子所討反者耳吾等何與乃與張士安譁而進以仁厚書示師立曰請以死謝衆師立自沈於池死君雄獻首天子仁厚入府縱繫囚賑貧絕詔拜劍南東川節度使光啟二年遂據梓州絕敬瑄敬瑄發維茂州羌軍擊仁厚斬之乾寧中追贈司徒

顧彥朗 顧彥暉 〔新唐書本傳〕顧彥朗彥暉者豐州人竝爲天德軍小校其使蔡京以兄弟有封侯相每厚禮之稍稍進秩黃巢亂長安率軍同復京師彥朗遷累右衛大將軍光啟中擢拜東川節度使檢校太保同中書門下平章事至劍門陳敬瑄使吏奪其節彥朗不得入保利州敬瑄誣劾彥朗擅興兵掠西境僖宗下詔申曉講和乃得到軍署彥暉漢州刺史初楊守亮忌壁州刺史王建凶暴欲逐之建聞合溪洞豪酋取閬中擊利州刺史走卽據二州守亮不能制彥朗與建雅舊陰助貲饗建攻成都彥朗挾故憾與并力道路鄣梗敬瑄告難於朝帝詔和解又勅李茂貞鐫諭會彥朗卒彥暉自知留後明年爲節度使中人送節爲縣州刺史楊守厚所留守厚發兵攻梓州暉告急於建建使李簡救之戒曰賊破并取彥暉無須再往也簡破守厚軍彥暉辭疾不克取

三台縣志

卷十六

五

三台新民印刷公司代印

建素有吞噬心以彥朗與婚婭久未忍及彥暉則交好愈疏而境上關賦相稽詬建怒景福元年遂攻彥暉彥暉請救於楊守亮遣楊子彥成梓執建大將王宗弼彥暉責曰王公何以見討君爲大將不諫云何宗弼謝罪卽解縛使就館轡幕衾服皆具更養爲子改名琛明年建將華洪破綿州守厚走得彥暉節時詔已進彥暉檢校司空東川節度使矣乾寧二年昭宗在石門督彥暉建赴行在建率兵二十萬次綿州卽劾彥暉劫輜運回襲之彥暉不敢出但遣人塞建舟路建遂襲取巴閬蓬渠通果龍利八州帝遣中人爲兩川宣諭協和使建奉詔還而兵不解彥暉謀窘因大畧漢眉資簡等州李茂貞亦欲爭其地使子興元節度使繼密引軍救彥暉以窺東川四年華洪率衆五萬攻彥暉取渝昌普三州壁梓州南敗彥暉兵奪鎧馬八百凡五十戰圍遂固帝仍遣左諫

議大夫李洵諭止建拒命帝以嗣郟王戒丕鎮鳳翔徙茂貞代建皆不奉詔梓有鏡堂世稱其麗彥暉嘗會諸將堂上養子瑤尤親信彥暉以所佩劍號疥癩賓佩之使侍左右嘗語諸將曰與公等生死同之違者先齒疥癩賓衆曰諾及圍急瑤請聚親信飲得同死彥暉顧王琛曰爾非我舊可自求生指頰垣令逸彥暉手殺妻子乃自刎宗族諸將皆死麾下兵猶七萬初韋昭度爲招討使彥暉建皆爲大校彥暉詳緩有儒者風建左右髡髮黥面若鬼見者皆笑至是錄笑者皆殺之私署洪爲東川節度留後

按此傳與歐史司馬通鑑文小異故全錄可參觀紀事志王建併東川一條

前蜀

徐廷瓊〔鄭藝德政序〕臣嘗讀唐書竊覩太宗每以爲將致治平必先仁誼得賢則理失人則危可鑒格言足徵邃古豈不以化馴易服威束

三台縣志

卷十六

六

三台新民印刷公司代印

難齊哉然農戰交修德刑共舉將亂也其政必暴將弊也其風必佻將圖九合之威亦賴五臣之佐苟虞害衆莫若任賢視今可以知昔矣高祖皇帝以汴賊殺君唐朝絕嗣左袒罕聞其歸漢同聲皆傲於吠堯上下相蒙酣爲醉國寰區之內億兆無依競陳推戴之誠願正君臣之位難違衆欲遂起不圖戡禍亂而俟中興協會盟而歸大國爲蜀之帝報唐之恩明孝皇帝受命之六年天清地寧珠連璧合肇修人紀於變時雍至若皇墳帝典之精河圖洛書之奧步驟於羲軒之際損益於文獻之間不然何其盡善盡美之如是也遂使蠻夷向化吳越輸珍麟鳳効祥草木呈瑞矧復英賢間出俊乂羅生上猶以爲未也方且思聖父勤求登用才哲循名責實較德論功沮勸有謀黜陟不濫鑿乾締構允歸睿作之功壽國陶鎔必有挺生之佐式扶昌運對越上元由是中外文

武將相公卿泊庶尹庶史各率厥職奉若天旨越正月武德軍將校吏民緇黃耆艾等列狀詣護軍使請以節度使徐廷瓊德政上聞願勒碑紀且以借留爲請上憂勤庶政以百姓爲心凝旒稱歎者久之謂翰林學士藝曰朕司牧元元將開壽域使國內郡縣治行皆如梓潼朕何憂哉夫吏久於官古之道也况衆欲之乎朕旣俞其請矣卿爲我撫其懿實播無窮之聞以塞民望微臣奉詔恐懼叙曰臣聞龍飛九五山川効雲將之靈鵬擊三千風水運波臣之化雖復同心同德推資十亂之功乃聖乃神永賴八元之佐內則夔臯協贊外則方召專征神謀且貞師律具有兼膺注意宜屬宏才此我皇帝之御宇也不顯帝圖顧茲天力四神踐雪五老飛星投綸負鼎之賢爭伸宏業委輅請纓之士競奮深機蕙帳空而明月常孤蒲輪至而清風自激猗與雖居宣武之間未若

三台縣志

卷十六

七

三台新民印刷公司代印

我朝得人爲盛也其或家連戚里身陟齋壇益揚謙損之風靡見驕矜之色功超賈鄧政邁黃韓有若武德軍節度使徐公斯可謂一時之英也公名廷瓊字敬明東海剡人一作鄉卽國之元舅也世緒標奇門風襲煥鎮爲峯鼎用作雄鎡父子則貴比金張兄弟則政同魯衛騰八龍之聲價齊一鳳之羽儀阮竹皆芳田荆並茂金相玉印各炫晨葩虎節師壇共觀畫錦徒思徧舉抑亦倦譚公王父唐京兆武功縣令追贈尙書左僕射太師高平王政績頻彰華勳早振自激封侯之志夙垂濟世之名並西晉殊功榮聯邸第南朝雅望地顯官婚貽謀各著於承家致用皆光其佐命朱輪華冕豈獨推恩令甲門風實先種德是賢奕葉孰與提衝歷佐昌朝宜鍾異氣公中邱會秀大爽炳靈幼挺英姿夙彰雅操稟說禮敦詩之教蘊經文緯武之才欲紹家聲遂參戎右敵國相吞之

候決在毫釐陰符必勝之機制於掌握琯戈寶鼎門崇八命之榮玉帳
金壇神授六韜之妙故能名高大國業嗣良弓輕鎮北之無文恨征南
之不武圮橋靈叟謂謀畧之可傳汶水神翁知功名而必立自繼膺睿
睠兩踐渙符四封無刁斗之音千里有袴襦之詠政成剖竹擁重執金
掌領孤兒每驚巡於晝夜扈隨大駕遠鎮定於邊陲纔復六飛將分雙
節上以鄴城奧壤潼水名區粵自艱難久罹瘡痍獄市無寄杼軸皆空
羣盜猖狂幸寇恂之去日遺黎憔悴望郭伋之來時不有改張何其俾
乂爰求賢帥式憇雄藩乃授武德軍節度使公攬轡遄征下車畢理彈
壓豪驚封殖疲癯究本尋源提綱振領害於人者雖大必去利於人者
雖小必行嘗謂人曰法者政之要也不可以不峻其隄防禮者教之本
也不可以不謹其律度食者民之命也不可以不勤其稼穡兵者戰之

器也不可以不肅其號令率是四者盡其一心上可以翼衛朝廷下可
以儀刑藩翰吾得之矣爾其觀焉公以管內數多亡命姑務偷生久聚
萑澤常爲虺蜴狡穴皆依於窮谷妖巢各恃於幽林化之不悛來而復
叛郡邑虞其蹂躪路歧苦於斂勑公密運良籌周施峭格盡投私罟皆
挾禍胎益其戎兵誠其強吏商旅無滯貢罔艱王尊申京兆之威龔遂
去潢池之患勞徠罕倦蕩析咸歸動有常規賞無橫費上勤時貢下贍
軍須月未及其授衣士已忻於挾纊賑其匱乏釋彼愁顏幸夜犬不驚
宵魚自放哀矜庶獄愼恤惟刑赭衣盡伏其神明丹筆立分其情僞絕
加等之聚斂革無名之征徭平衡不謬於錙銖嘉量罔欺於圭撮公又
仰稽前古俯瞰遺蹤思棗祗闢地之謀味韓浩屯田之計膏腴靡棄黍
麥頻豐夢果應於牧人利可資於寡婦貢賦加倍獻奉相望又歲別進

軍食因沃潤之鄉置牢盆之務商徒繁會官帑委輸檢吏通民機能制用矯時阜俗儉以率先貫天錢而已靡星文認寶氣而已有雄劍缺文來奏課運最聞薤本可留足表富人之術芋區難並咸知濟物之方公以鳴社嘉辰繞樞令節祈聖壽有莊嚴之懇祝宗祧於降誕之期自舍俸金於惠義寺構華嚴大閣向者公府未完軍衛莫稱於是載修輪奐別創規模庭架虹梁門羅虎戟層樓燕賀偏增鼓吹之雄廣廈翬飛益動旌旗之色路當衝要地控都畿使車晝夜以交馳候官往來而宿餉每傾公帑用飶賓筵休聲洽聞靈貺昭感紫芝三秀黃犢並生天唯發祥地不愛寶迴掩得禾之異果符登麥之文歌德詠仁言將不足含和吐氣樂固難名大矣哉公之問俗觀風阜財述職焉可得而稱也爵賞既行中外同嘉遂册拜中書令趙國公加食一千戶通前五千戶公嶽

降標奇星精稟異溫如珪璧郁若椒蘭智若韜鈴言無鉤鉅運籌決勝苟攸可比於良平仗鉞被威謝艾足同於方召研機召禮植操資忠允武允文多材多藝軍中講學馬上註書揮刀則立覩飛泉盤稍則惟聞折樹而又貴不自滿謙而益光饗士投醪延賓比飮帳下之犀渠貝冑咸感吮癰樓中之螭首蛾眉甯矜笑蹙閨門密行簪組美譚里巷相觀風雲動色宸衷夙注寵詔已行致闔境之允諧固本朝之是衛况家豐懿戚治陟殊尤心膂連營蓄雷霆於北落股肱重鎮寄柱石於東川克副分憂合膺異渥宜其珉麗德瑩檢圖功懋績著擁旄化行偃草比屋而乞留侯霸叫閭而願借耿純詎可使螭首翠碑未披文而相質麟臺彩筆不寫照以傳神臣志慕陽秋工非潤色仰遵睿旨敢述殊勳曾無少女之詞預怯中郎之監所冀陵遷谷變尙窺沈水之文地久天長永

觀生金之字謹爲銘曰金行啟運鼎業鑿乾麟御瑞紀鳳舞昌年層潤
浩注國祚遐延光凝瑤匣福藹祥編上詰繼文皇圖增煥得一踐羲登
三轅漢懿網牢籠大鑪眞觀宗社還資微明接旦太虛寥寥中有元精
麗物爲瑞麗人爲英英徐公爲甯而生膏脂不染獄市無驚智勝兵
強化行民附屢立奇功繼膺寵數帝念徐公聿齊其務迺睠梓潼并有
饒賦公至若何時雨滂沱枯苗擢穎涸轍騰波摧奸禁暴劉弊止訛襁
負而至動植興歌八政何先以食爲天臥鼓勸農免胄服田耒耜接肘
臺笠摩肩閭閻封靡稼穡雲連衆害旣去纖惡皆除頒宣化育慎恤刑
書徽纒自朽囹圄常虛輕徭薄斂政協蒲蘆老安少懷邇至遠肅風雨
時若家給人足戶溢版籍賦登公牘儲峙孔多貢輸相屬神明之正誰
爲之師公之俱美福祿攸宜位隆鳳沼恩注龍墀梓人頌德天子嘉之

三台縣志

卷十六

十

三台新民印刷公司代印

爰命荒墟奉揚聲烈揚子神疲江生思絕涪水東注銅山西揭帶礪無
期永旌賢哲

宋

馮

瓚

〔宋史本傳〕馮瓚字禮臣齊州歷城人風神俊爽善談論有吏

材太祖甚寵之擢拜左諫議大夫出知舒州建隆四年春徙知廬州乾
德三年以本官充樞密直學士時劍外初平卒有亡命者散匿爲盜命
瓚知梓州無何蜀軍校上官進率亡命三千餘人掠民數萬夜攻州城
瓚曰賊乘夜奄至此烏合之衆以箠梃相擊必無固志正可持重以鎮
之且自潰矣城中止有雲騎兵三百令分守城門瓚坐城樓密令促其
更籌未夜分擊五鼓賊悉遁去因縱兵追之擒上官進斬於市誘其餘
黨千餘人並釋其罪境內獲安

郭廷謂〔宋史本傳〕郭廷謂字信成徐州彭成人幼好學工書善騎射宋初知亳州乾德二年代還改絳州防禦使馮瓚知梓州爲僕夫所訟召廷謂爲靜江軍節度觀察留後以代之州承舊政有莊宅戶車脚戶皆隸州將鷹鷂戶日獻雉兔田獵戶歲入皮革又有鄉將都將鎮將輩互擾閭里廷謂悉除之

張雍〔宋史本傳〕張雍德州安德人治毛氏詩開寶六年中第釋褐東關尉太平興國初有薦其材者召歸改將作監丞淳化初遷爲大府少卿二年加右諫議大夫徙兩浙轉運使入知審刑院三年充戶部使出知梓州就命爲西川轉運使俄復知梓州至道二年改工部侍郎大中祥符元年請老以尙書右丞致仕

陳世卿〔宋史本傳〕陳世卿字光遠劍南人雍熙二年登進士第解褐

三台縣志

卷十六

十一

三台新民印刷公司代印

衡州推官再調東川節度推官會李順寇兩川知州張雍以州兵馬爲數部使官分領世卿素善射當城一面親射中數百人賊寢盛同幕皆謀圖全計世卿正色曰食君祿當委身報國奈何欲避難爲他圖耶亟出白雍曰此徒皆懦儒存之適足惑衆不若遣出求援雍從之賊旣引去世卿適丁外艱雍表其材詔追出視事就改掌書記凡七年歸朝爲祕書郎

盧斌〔宋史本傳〕盧斌開封人端拱中爲永興軍華州巡檢以勞改供奉官賜白金緡錢衣帶尋爲梓遂十二州都巡檢使太宗諭之曰川陝人情易搖設有寇攘雖他境亦當襲逐仍許便宜從事不須中覆淳化四年冬李順爲亂斌卽率兵六百抵成都鬪戰連月殺數萬人明年成都守斌還梓州集十州兵赴援知州張雍委以監護之任會江水

汎溢子城斌勸諭州民翌日畚鍤大集自城西大濠中掘塹深丈決西河水注之以環城二月賊渠相里貴衆二十一萬傅城下城中兵裁三千斌曰軍法倍兵不戰然狂醜烏合非訓練之師以吾仗天子威靈必可殲蕩卽感厲士伍負土塞南北門爲固守之計又突出與賊戰擊刺三十餘台賊稍卻俄復大設機石連弩衝車雲梯四面鼓譟乘城矢石亂下斌與州將隨機設備長圍八十日會王繼恩令石知容率兵來援斌出東門迎勞王師賊不戰而潰斌乘勝追斬及納降二萬餘斌在川陝六年以孤軍禦寇屢立戰功表求入奏太宗遣使諭之曰俟妖孽盡殄當召汝旣而賊黨集梓綿漢三州境上斌往平之未幾代還太宗親加勞問拜東上閣門使檢校左僕射加食邑三百戶

燕 肅 「宋史本傳」燕肅字穆之青州益都人少孤貧游學舉進士累

三 台 縣 志

卷十六

十二

三台新民印刷公司代印

遷龍圖侍制權知審刑院知梓州嘗造蓮花漏所至皆刻石以記其法州郡用之以候昏曉世推其精密「輿地紀勝」天聖六年燕肅知梓州作蓮花漏

趙 抃 「宋史本傳」趙抃字閱道衢州西安人進士及第翰林學士曾公亮未之識薦爲殿中侍御史彈劾不避權倖聲稱凜然京師目爲鐵面御史請知睦州移梓州路轉運使改益州蜀地遠民弱吏肆爲不法州郡公相餽餉抃以身帥之蜀風爲變窮城小邑民或生而不識使者抃行部無不至父老喜相慰姦吏竦服召爲右司諫「輿地紀勝」趙抃以嘉祐三年爲轉運使

王 汲 「蜀人物志」王汲通川人嘉祐中嘗作天將以夫子爲木鐸賦士以爲矜式因呼王木鐸後舉進士官至梓州通判多政聲著有太平

讜議

趙尙寬〔舊縣志〕尙寬知梓州恩惠洽民爲一時所推重比去吏民遮道攀戀不已

韓 璠〔宋史本傳〕韓璠字君玉衛州汲人登進士第知定州安喜縣爲政強力能使吏不賄守韓琦稱其才熙寧初爲梓州路轉運使朝廷命諸道議更役法璠首建併綱減役之制又請裁定諸州衙簿於是王安石言璠所言皆久爲公私病監司背公邀譽莫之或恤而獨能體上意宜加賞乃下詔褒璠賜帛二百入爲鹽鐵副使

王吉甫〔宋史本傳〕王吉甫字邦憲同州人舉明經練習法律試斷刑入等爲大理評事累遷大理少卿請知梓州梓在東川爲壯藩戶口最盛轉運使欲增折配以取羨餘吉甫謂其僚曰民力竭矣一增之後不

三台縣志

卷十六

十三

三台新民印刷公司代印

可復減吾寧貽使者怒忍爲國斂怨爲民基禍哉竟卻之歷提點梓州路刑獄開封少尹

范百祿〔宋史范鎮傳〕兄子百祿字子功第進士熙寧中鄧綰舉爲御史辭不就提點江東利梓路刑獄加直集賢院熊本治瀘蠻事夷酋力屈請降裨將賈昌言欲殺以爲功百祿諭之不聽往謂本曰殺降不祥活千人者封子孫奈何容驕將橫境內乎本瞿然卽檄止之〔輿地紀勝〕熙寧六年范百祿爲梓州提刑

周 尹〔蘇詩施註〕周尹字正孺成都新繁人任御史坐言茶事外補後呂微仲丞相見所奏言歎曰君子哉斯人也因言於上除直祕閣在東川人安其政願復借留詔許之〔續通鑑長編〕元祐三年七月考功郎中周尹知梓州

盧知原〔宋史本傳〕盧知原字行之湖州德清人以父任知歙縣因近臣薦赴都堂審察累遷梓州路轉運副使時承平既久戎備皆弛知原招補兵籍築城亘二十餘里王黼當國費出無藝知原因疏言之黼怒罷去久之起提點京東刑獄改江西轉運副使時過闕入奏徽宗勉之曰卿在蜀道功效甚休遂賜三品服

虞 祺〔宋史虞允文傳〕父祺登政和進士第仕至太常博士潼川路轉運判官〔明一統志〕祺官潼川轉運判官以仁恕愛民秦檜遣使臣督一道例外貢方物祺以地瘠民困聞於上檜慚而止

郭 倫〔氏族譜〕蜀郭氏衆多而家於北城者人號北郭倫登崇寧第居甲科初仕太子學錄出爲郡刺史凡四十任其帥潼川奏蠲虛額與都轉運使不合遂致仕

三 台 縣 志

卷十六

十四

三台新民印刷公司代印

楊春前〔舊縣志〕春前知潼川民戴其恩繪像祀之

景興宗〔一統志〕景興宗紹興中守潼川活饑民甚衆

李 燾〔宋史本傳〕李燾字仁甫眉州丹稜人紹興八年擢進士第恥讀王氏書獨博極載籍搜羅百氏慨然以史自任本朝典故尤悉力研覈做司馬光資治通鑑例斷自建隆迄於建康爲編年一書名曰長編浩大未畢仍做光體爲百官公卿表史官以聞詔給札來上制置王剛中辟幹辦公事知榮州榮因溪爲隍夏秋率苦水潦燾築防捍之除潼川府路轉運判官入境劾守令不職者四人縣多聚斂燾括一路財賦額通有無酌三年中數定爲科約上之朝頒之州縣乾道八年直寶文閣帥潼川兼知瀘州首葺石門堡以阨夷人奏乞戒茶馬司市叙州羈縻馬毋溢額戒官民毋於夷漢禁山伐木造舟奏移鎖水於開邊舊池

皆報可淳熙中累官敷文閣待制頃之熹子厓塾繼亡上欲以吏事紓熹憂起知遂寧府除敷文閣學士致仕

趙善譽 〔宋史宗室本傳〕趙善譽字靜之太宗之後也幼敏慧力學乾道五年試禮部第一累遷大理寺丞湖北常平茶鹽提舉移潼川路提刑轉運判官遂寧守徐詡乏廉聲部使者以其故御史寬假之善譽過遂寧詡出迎善譽抑使循廊詡大沮郡人聞之爭訟其過善譽劾諸朝宰相王淮善詡寢其章善譽徑以聞罷詡又以羨貲給諸郡置莊民生子及娠者俱給米威惠並孚宗子寓蜀者少業儒善譽卽郡庠立學以教之人始感勵引年乞祠歸處一室以圖書自娛無疾而卒年四十七時淳熙十六年也善譽早失怙恃撫育諸季備至居官廉靖自將多所著述郭雍朱熹嘗取其易說云

三台縣志

卷十六

十五

三台新民印刷公司代印

張行成 〔宋元學案〕張行成字文饒臨邛人乾道間由成都府路鈐轄司幹辦公事丐祠歸杜門十年著周易通變四十卷官至兵部郎中知潼川府汪應辰帥蜀薦其有捐軀殉國之忠而又善於理財學者稱觀物先生

岳霖 〔續資治通鑑〕淳熙十三年二月庚戌詔潼川運判岳霖職事修舉除直徽閣

許奕 〔宋史本傳〕許奕字成子簡州人以父任主長江簿丁內艱免喪調涪城尉慶元五年甯宗親擢進士第一授簽書劍南東川節度判官未期年持所生父心喪召爲祕書省累官顯謨閣待制知瀘州移知夔州表辭不行改知遂寧府捐緡錢數十萬以代民輸復鹽筴之利以養士爲浮梁作隄數百丈民德之畫像祠於學進龍圖閣待制加寶謨

閣直學士知潼川府霖雨壞城撤而築之不以煩民亦捐緡錢十二萬爲十縣民代輸於是其民亦相與祠於東山僧舍

高定子〔宋史本傳〕高定子字瞻叔稼之弟也嘉泰二年舉進士授鄆縣主簿吳曦叛乞解官養母曦誅攝府事宇文公紹以忠孝兩全薦之調中江縣丞

家炎〔魏了翁知富順監家侯墓誌銘〕家炎字文甫眉山人爲人篤謹端靜以父任入官知潼川府鄆縣通判叙州知富順監丁內憂起知資彭普三州鄆縣二十年皆攝令人疑其不利虛正寢弗敢居侯至新其居以將母積負三萬緡侯疏滯已責未幾縣以治則又闢齋居以燕賓友甃經涂以便行旅無復近世簡陋鹵莽之政最後守普承兵火盜創殘之餘折囂訟簡冗費學故有沒盜田載祀四十鄉人有爲盜謀並

三台縣志

卷十六

十六

三台新民印刷公司代印

緣宣撫司檄反其田上論弗與猶欲爲盜地侯具本末白宣撫使復歸於學

魏了翁〔宋史儒林本傳〕魏了翁字華父邛州蒲江人慶元五年登進士第授簽書劍南西川節度判官廳公事改祕書省正字史彌遠入相專國事了翁察其所爲力辭召命丁生父憂解官心喪築室白鶴山下以所聞於輔廣李燔者開門授徒士爭負笈從之由是蜀人盡知義理之學嘉定四年擢潼川提點刑獄八年兼提舉常平等事遷轉運判官戢吏姦詢民瘼舉刺不避權右風采肅然上疏乞與周惇頤張載程顥程頤錫爵定諡示學者趣向朝論躉之如其請遂寧闕守了翁行郡事卽具奏乞修城郭備不虞廷議吝其費了翁增陴浚隍如待敵至者後一年潰卒攻掠郡縣知其有備不敢逞人始服預防之意十年遷直祕

閣知瀘州主管潼川路安撫司公事丁母憂免喪差知潼川府約已裕民厥績大著若游似吳泳牟子才皆蜀名士造門受業十五年被召入對上迎勞優渥嘉納其言進兵部郎中俄改司封郎中兼國史院編修官紹定五年差提舉江州太平興國宮尋知遂寧府辭不拜進寶章閣待制潼川路安撫使知瀘州彌遠薨進華文閣待制同簽書樞密院事卒贈太師諡文靖

劉光祖 〔宋元學案〕劉光祖字德修簡州人第進士除劍南東川節度推官辟潼川提刑司檢法淳熙五年召對論恢復事請以太祖用人爲法除右正言知果州寧宗卽位除侍御史改司農少卿入對獻謹始五箴遷起居郎韓侂胄擅朝政目士大夫爲僞學禁錮之先生撰涪州學記謂學之大者明聖人之道以修其身而世方以道爲僞小者治文章

三台縣志

卷十六

十七

三台新民印刷公司代印

以達其志而世方以文爲病好惡出於一時是非定於萬世諫官張釜指爲訕謗比之楊惲奪職侂胄誅召除右文殿修撰以寶謨閣直學士知潼川府請改正憲聖慈烈皇后諱日從之陞顯謨閣直學士嘉定十五年卒諡文節趙忠定嘗稱先生諫論激烈似蘇軾懇惻似范祖禹世以爲名言

李 稟 〔宋元學案〕李稟字季允丹稜人文簡第七子也學者稱爲悅齋先生從張南軒游紹熙庚戌進士以詔試爲館職廷對忠讜累官至潼川府時蜀有張福之亂逐制使戕總領剽殺縱橫吏或死或逃無敢抗者已殘削且及潼先生疾馳至任提刑曹叔遠方謀死守見先生至大喜亟集義壯治諸縣隍堞設木隔礮凡可以壞賊之具無不集上下激勵賊覘知有備取他道去先生之兄文懿守遂亦盛爲禦賊之計用

是以困賊使自斃而成都亦以此得安城西牛頭山極險先生謂叔遠曰昔者相里貴據此山以攻城幾爲所破今可委此山於城外邪乃跨山包之通溪之渠以達武江而天險爲城中所有遂恃之無恐改知常德府以安靜爲治改知夔州時與士子講學夔人愛之內召累遷爲禮部侍郎理宗時出爲沿江制置副使兼知鄂州與諸司爭曲直不相能請罷召知遂寧府遂寧故文簡文懿所治有遺愛聞先生至曰吾舊郎君也其政不肅而成蜀事日壞朝臣亦多願往者乃以先生爲四川制置使兼知成都府先生以安靜鎮之蜀中稍治已而以禮部尙書詔還累遷資政殿學士知眉州卒諡文肅先生父子兄弟以文章著眉人比之三蘇

蘇在鎔

〔宋元學案〕

蘇在鎔字和父郫人受學范文叔

名仲黼成都人

之門淹

三台縣志

卷十六

十八

三台新民印刷公司代印

貫諸書以進士官魏城縣丞縣民仇其長官鼓衆入城將爲亂先生聞變挺身出諭之民爲散去長官得免死顧反以是忌之先生卽引去其後爲潼川常平司幹以白冤獄忤上官遂請致仕

彭大雅

〔舊通志〕

彭大雅嘉祐初進士淳祐末爲東川制置副使築城

守禦有功

趙卯發

〔宋元學案〕

趙卯發字漢卿昌化人與唐忠介震師事王仲潛

淳祐十年以上舍登第爲遂寧州司戶潼川簽判素以節行稱咸淳十年通判池州攝州事元兵薄城卯發書几上曰君不可叛城不可降夫婦同死節義成雙與妻雍氏同縊從容死卯發始爲此堂至是指所題扁謂客曰古人謂慷慨殺身易從容就義難此殆其兆也事聞贈華文閣待制諡文節雍氏贈順義夫人錄二子爲京官

元

朶兒赤 〔元史本傳〕朶兒赤字道明西夏寧州人世祖卽位授中興路新民總管至官錄其子弟之壯者墾土塞黃河九口開其三流凡三載賦額增倍就轉營田使秩滿入覲帝大喜陞潼川府尹時公府無祿田朶兒赤乃以官曠地給民視秩分畝而薄其稅潼川仕者有祿自此始

劉 緯 〔元史劉伯林傳〕劉緯元振子數從父行軍元振卒緯襲職佩虎符爲萬戶守潼川創立遂寧諸處山寨從圍釣魚山數戰有功攻台州授潼川路副招討遷副都元帥復授管軍萬戶遷同知四川西道宣慰司事入朝進四川西道宣慰使拜陝西行省參知政事卒

劉元禮 〔元史劉伯林傳〕劉元禮黑馬第五子也性渾厚有謀常從父在軍中歲甲寅授金符爲京兆路奧魯萬戶中統四年遷興元成都等

三台縣志

卷十六

十九

三台新民印刷公司代印

路兵馬左副元帥至元元年遷潼川路漢軍都元帥二年九月宋制置夏貴率軍五萬犯潼川元禮所領纔數千衆寡不敵諸將登城望貴軍有懼色元禮曰料敵制勝在智不在力乃出戰屢破之復大戰蓬溪自寅至未勝負不決激厲將士曰此去城百里爲敵所乘則城不可得入潼川非國家有矣丈夫當以死戰取功名時不可失也卽持長刃大呼突入陣所向披靡將士咸奮無一不當百大敗貴兵斬首萬餘級生擒千餘人捷奏賜錦衣二襲白金三錠名馬一匹金鞍轡弓矢召入朝命復還潼川立蓬溪寨

暢師文 〔元史本傳〕暢師文字純甫南陽人幼警悟家貧無書手錄口誦過目輒不忘至元五年陳時政十六策丞相安童奇其才辟爲右三部令史十四年除東川行樞密院都事尋除承直郎潼川府治中修府

舍發地得銀五十錠同僚分師文十錠不受用以修廟學及傳舍餘作酒器給公用十九年改同知保甯路事

明

董煥英 〔舊縣志〕董煥英寧波人洪武間自巴州牧遷知潼川以文章飾吏治卓有政聲

鄧文彥 〔舊縣志〕鄧文彥大同人洪武間知潼川持已方直賦役均平後陞工部侍郎

張鳳羽 〔雲南通志〕張鳳羽字拱辰太和人宏治戊午舉人任酆都教諭士貧不能婚葬者隨力助之歲饑作粥賑濟遷知資陽縣明於斷獄知潼川州值威茂張遊擊死吐蕃之難捧檄往勘排浮議而白其忠里中稱爲玉山先生

三台縣志

卷十六

二十

三台新民印刷公司代印

蔣容 〔舊縣志〕蔣容字德夫武進人宏治中知潼川下車三月卽增修學宮創東西廊舍三十間扁曰六德爲諸生講讀之所又撰郡志以振勵人文建名世堂以表章先賢築東城隄以消水患修來薰橋以成利涉政平人和甘露降於庭柏士民德而頌之

胡纘宗 〔明史劉訥傳〕胡纘宗陝西秦安人正德三年進士由檢討爲嘉定判官〔舊縣志〕胡纘宗正德中知潼川興學教士以文章政事稱於時

張東周 〔舊縣志〕張東周蒲圻進士嘉靖間由雲南僉事謫潼川州同條陳地方利害上官多允行之

胡希瑗 〔湖北通志〕胡希瑗字橋南大冶人嘉靖舉人知潼川州會三殿災采大木學宮有喬木數百章議欲取之瑗曰奈何伐廟樹以自功

別采得大木視旁郡獨先

譚道生 〔舊縣志〕譚道生始興人知潼川廉潔有守具幹濟才郡城圯壞伐石更修制強梗撫善良簡詞訟在任七年郡中大治致仕去

張厚 〔舊縣志〕張厚貴州宣德司舉人知潼川政多仁愛嘉靖戊子年大荒力請當路得發帑金全活甚衆明年麥秀五歧以得罪監司去官士民泣送農人釋耒耜爭肩其輿出境

趙德宏 〔雲南通志〕趙德宏字有容鶴慶舉人知潼川州贖鍰悉令輸粟得粟萬八千石後歲大饑隣邑道殣相望獨潼川得免又興建圯城潼人德而祀之

陶清 〔舊縣志〕陶清字揚之建昌人初守劍州以治繁調知潼川端方剛果吏不爲奸新學校正士習潼人德之

三台縣志

卷十六

二十一

三台新民印刷公司代印

顧雲鳳 〔舊縣志〕顧雲鳳常熟進士萬歷丁亥知潼川州爲政得大體凡民輸課必令自稱兌不多分毫治潼七年民深愛戴陞刑部員外郎去任

王序 〔金谿縣志〕王序字子倫成化十三年舉人授潼川州學正潼久乏科目序自嚴程課正條約以作興人材爲己任後聯擢科甲者十餘人潼士多思其教遷南直隸海門縣訓導

清

張應詔 字圖園貴州黎平舉人初任直隸肅寧縣康熙四十三年任潼川州知州有德政內升刑部員外郎

王以豐 正白旗漢軍監生歷任縣令擢知潼川州在任五年民懷其德肖像於琴泉寺以祀之

柴鶴山 字修祺浙江歸安舉人補中書擢刑部郎中乾隆五年出守潼川吏民畏威懷德郡稱大治致仕去士民遮道送之

費元龍 〔錦里新編〕費元龍字雲軒浙江歸安人乾隆丙戌進士補鹽亭知縣調繁成都擢資綿二州知州卓薦授潼川知府旋歷川北道陞按察使司副使在川十餘年整躬率屬潔己愛民事無鉅細矢公矢慎藹然有大儒風蒞潼時加意作人建文昌宮奎星閣勅立文峯書院暇則親入講堂與諸生指授文義辨論經旨一時人材多所造就及陞臬司一切命盜案件再三研鞫務期得情最號平允尤具知人鑑成都張太史翬綿州李太史調元皆公童試時所拔士也後陞任去仕至京卿沈清任 字澹園浙江仁和進士由禮部郎中出知潼川府修尊經閣明倫堂改文峯書院爲草堂書院督學吳省欽爲文記之見學校志

三台縣志

卷十六

二十二

三台新民印刷公司代印

張松孫 字鶴坪江蘇長洲人乾隆乙巳官潼川府知府創修府志潼川自雍正十二年改州爲府無府志絕續之交能舉廢墜其苦心實不可沒云

彭洋中 字曉杭湖南舉人同治三年官潼川知府沒於任所作絕命辭士民哀之相弔以詩明經陳謙詩序云太守蒞官雖淺民感頗深告終官舍士民走相弔唁咨嗟太息溢於城闈魚腹之悼三閭鶉首之悲五殺不是過也茲錄太守原作暨陳謙詩二首太守絕命辭云送老梓州城蹉跎爲此行人稱勤太守我愧舊書生率屬風方被安民俗未清平生虛願大太息無一成 同孫生二歲而我未攜持頗望吾門大其如汝獨遲貽謀千卷在陰德寸心知雙硯留傳汝他年知汝悲 吾兒書信至總是問歸期本以宦情澹徒爲誥命遲知汝性情篤切勿哀毀移

德言功不朽努力補無虧 憶我西征日山荆留勿行豈不安時命丈
夫志四方數年成底事萬里有歸喪惟祝期頤壽還如君母長一陳謙
挽詩云一捧檄來潼郡五馬何翩翩愍茲兵燹罹補救損食眠讞獄徧
八邑犀照燭重淵蒞官甫數月壅滯疏積年不圖吾小人復見覆盆天
奸宄畏公明士女愛公賢死或緩須臾當不用蒲鞭方期絃歌化何遽
館舍捐浮雲一以散千載見無緣太息復太息失此明鏡懸 草堂絳
冕地濟濟滙諸生大昕鼓久息燕麥徒空名公來拂硯席招誨立前楹
僉謂得人師經並園橋橫兼示法操觚講解亦何精一疵有必糾一善
有必成暫假公餘閒勤此月旦評公非我官長公實我父兄教思猶在
耳悲思忽屏營天乎胡不仁使我泰山傾

李德良 字伯起順天寶坻人由拔貢官知縣洊擢潼川府知府崇興文

三台縣志

卷十六

二十三

三台新民印刷公司代印

教郡書院廢弛有年蒞任後延師講學士氣蒸蒸稱極盛焉

熊紹璜 字倏然廣西靈川舉人光緒甲申署潼川府知府以開新西門
爲士民頌禱建坊通衢事詳城池志

魏邦翰 字季蕤江蘇邳州舉人由郎曹出知潼川府蒞官八年捍災禦
患有功德於民民到於今尙嘖嘖稱其救水一事云光緒己丑六月潼
川大水捍衛勤勞

坐是得病歿後士民輓以聯語有
蒼茫風雨立中流之句紀實也

阿麟 字子祥正黃旗光緒間由郎曹出知潼川府培植人才增修府
志有政聲先三邑書差肆意索取訟費鄉民苦之麟刊訂規費飭縣實
力奉行積弊永除邑人於新西門外爲之建坊

雷鍾德 字仲宣陝西進士光緒間署潼川知府剛介有爲寬嚴得體刊
訂訟規裁抑差承勒索凡控案到府發奸摘伏判決如流不數月而積

案一清吏民畏威懷德立位於琴泉寺以祀之

徐世楹 字春江浙江富陽舉人以大挑分發四川補鹽亭縣乾隆三十二年繕葺郡城上官知徐廉能請權三邑徐親爲經理不辭勞苦始工於是年十二月訖工於三十五年七月工程堅實鞏固又於東門外建築萬年堤以禦水患民利賴之

鄭璇 江蘇太湖廳舉人乾隆四十七年官三臺知縣有惠政尤善折獄邑民侯某一家四口被殺而犯逸無蹤公聞報往驗將至侯家里許侯有犬嚎迎公至其家訊畢命役隨犬所至緝之果得凶手三人一訊而服其誠信及物如此見公所撰義犬記 先是我縣僅有州志而無縣志乾隆五十一年公始纂三臺縣志爲我縣有志權輿

沈昭興 字研怡浙江秀水人嘉慶乙亥官三臺縣重修縣志

三台縣志

卷十六

二十四

三台新民印刷公司代印

邵良 順天大興人嘉慶四年知縣事時教匪未平川督魁倫擁大兵駐牛頭山驕甚部屬常入城騷擾民告公輒繩以法兵大譁愬於魁魁怒嚴令傳公鎖其輿以往將施重譴士民千餘人擁公赴寨爲公請公謂魁曰兵以衛民非擾民也擾民干軍令某代公約束非敢擅責魁辭沮謝遣之衆歡呼去同治初邑人爲劉公立德政碑謂前庚申教匪之亂城守賴邵公後庚申藍逆之亂捍衛賴劉公可謂後先輝映令人思慕如此

陳仲良 廣東番禺縣舉人道光十六年知三臺縣勤政愛民卓著循聲邑人德之

何保 字鎮峯浙江山陰人道光戊戌官三臺因書硯農汪桂山兩縣尹所留公事雜欸復集巨貲拓雲臺書院規模振興文教邑人至今頌

之

彭榮槐 字蔭軒江西湖口舉人道光辛丑官三臺集貲購巨宅於郡城北街改作雲臺書院爲諸生講習之所士人德之

章 燮 字晉洲貴州畢節縣舉人咸豐間知三臺縣愛民息訟多惠政邑人立位祀之

王 浚 字曉泉直隸河間人咸豐甲寅官三臺有政聲整飭書院士人德之

劉瑞琳 字紫珊陝西三原人咸豐庚申官三臺次年二月藍逆圍城極力捍禦縣城及牛頭山皆賴以全悍將陳八仙率部駐城內謂有協防功向公索酌餉否則縱掠三日公再三爲民請命弗允適夔關解鹽課過境公酌截其數以應嗣免冠見督帥駱公服擅截罪駱公嘉其達變

三 台 縣 志

卷十六

二十五

三台新民印刷公司代印

有膽畧且急於保民也不之責命任事如故同治改元以牛頭山土城不可恃乃改築石城至今屹然重鎮邑人於東門城樓建德政碑又塑像祀於縣城隍祠

陳洪緒 字輔臣湖南新寧人同治閒官三臺有惠政邑育嬰恤嫠局爲位祀之

王宮午 字介卿河南祥符人庚申進士同治庚午辛未閒官三臺愷悌精明尤能以文章飭吏治川督吳勤惠公深器之密薦於朝交軍機處存記宦蜀三十年所至有聲至今三臺士民猶稱道不衰云

奎 榮 字聚五正紅旗蒙古繙譯進士光緒間官三臺愷悌精明刑不濫用凡訊斷恆以情理返覆開諭之人均折服及代去邑人立碑以志去思

武西莖 光緒間知三臺縣有幹濟才時拳匪擾亂督勇剪除被脅者概不究全活甚衆士民悅服

鄒耿光 貴州桐梓縣人光緒癸卯奉制府岑公檄權三臺篆時比歲荒歉饑民附拳匪裹脅甚衆自景福院白廟子鵝落山宜軍山等處出沒誘煽勢益猖獗公督練民團與靖川營協力防堵殲厥渠魁宥其脅從餘匪潰散縣境肅清公又以饑實萌亂賑宜急於是稽審災戶賑糶并行合太后頒帑大府撥欸及捐廉勸募之金共用銀七萬餘兩而賑事告竣當賑之初舉也又有修復永城堰役蓋以工代賑也公策駕江干循求遺蹟并詣綿州會直牧朱公議購綿州濱江荒地開溝上流綿人樂從以開賑後十八日始役饑民利得值趨役七八千人婦孺皆助運負用錢一萬一千緡共五十日畢工自公任事八閱月匪亂初平賑務

三台縣志

卷十六

二十六

三台新民印刷公司代印

堰工并時而舉衆請生祠公堰側公立止之

馮元謨 字麗東遵義縣監生光緒十四年官三臺丞約已清廉明敏善斷先是丞役多飢法婪索馮乃嚴定規則申請立案遵行誣告之風以息獄訟大減未一年以憂去貧不能歸部民釀金相送至百里不絕馮概卻謝後所部爲建坊以頌遺愛至今猶存

劉鍾岳 字筱溪江西吉安人光緒間官三臺縣丞前後十年明察善斷人不能欺監修永成堰建設蘆溪男女學校經營籌畫頗著勤勞

白曾熾 字仲昌直隸寶坻人光緒間官三臺縣丞廉隅自謹嚴禁差役苛求每巡行就地訊斷摘伏如神釐正風化街市婦女相戒不敢夜行在任僅一年幾於男女異道至今稱之

向廷賡 〔遵義府志〕向廷賡字修野號畚海康熙丙子科遵義舉人性

聰惠博極羣書任巴縣邛州潼川等處教官大學士鄂爾泰總制滇黔知廷賡賢列入薦牘除湖南巴陵縣知縣以老病歸雍正十一年詔舉博學鴻詞當道以廷賡名上辭不赴年六十餘卒

黃步青 綿州人字漢南號鹿堂乙酉拔貢登庚寅恩科舉人後任成都教諭陞潼川教授一以獎勵人才爲當躬切務截取辭不就歸田後築晚香園終日吟咏其中足跡不履城市年八十有五疾每夜夢中背誦五經一字不遺可謂篤學矣

羅從新 字偉臣巴縣廩貢咸豐間任三臺教諭積學能文剛正自守不畏強禦其垂教嚴而有法一變佻達之習士氣文風蒸蒸日上在官二十四年始終一節士林至今猶稱頌弗衰所著有敬修堂文集行於世

民國

三台縣志

卷十六

二十七

三台新民印刷公司代印

張政 字梓忠江油舉人清末諮政院議員民國五年以劊閣知事改署三臺知事政簡刑清民樂休養時有構大獄冤陷里人者株連甚多張廉得情毅然請於當軸特委專員平反上達法院案結政聲益著生平學識淹雅宦迹所經褒揚節孝推獎人材搜羅金石提倡風雅嘗於長平山捐廉建唐徵君趙蕤祠著有悔齋詩文集若干卷

忠節

唐

謝萬歲 〔新唐書高宗本紀〕永徽元年十二月炎州獠寇邊梓州都督謝萬歲死之

宋

魏 靄 〔宋史理宗本紀〕淳祐五年十一月詔大元兵入蜀潼權川府

魏靄死於官守贈官三轉官其一子

明

陳君寵 〔新化鄧顯鶴撰潼川州牧陳簡之先生傳〕先生姓陳氏名君寵字簡之湖南新化人世居縣西之橫陽山橫陽山者其地四圍皆山中迤邐平衍二十餘里皆平壤一山橫亘日光虧蔽其上故名橫陽俗呼黃陽者誤也山上有砦元季居民避亂居此故又名砦邊新人言望族者必稱砦邊陳氏先生又陳氏之望也祖南溪翁名文璧善琴蓄古琴二能召仙嘗以其術致呂仙於其地之滄浪亭撫絃動操移時乃去後遂名其地爲會仙橋名仙所撫者爲弄雲翁自撫者爲懷仙國朝乾隆中弄雲歸長洲褚氏筠心學士廷璋集中有弄雲篇是也父大謨有隱德先生性誠篤幼師事同邑譚昌期昌期以理學名於時言動皆有

三台縣志

卷十六

二十八

三台新民印刷公司代印

禮法先生執經問難終日侍立不命之退不敢退既長以文雄於時舉萬歷戊午年湖廣鄉試第一報至前夕其父夢學舍奎星樓上有龍臥古鐘下解者以鐘形類之一下龍爲寵字兆君寵當得解已而果然屢應禮部試不售崇禎時授四川羅江縣知縣時賊氛四起先生從父兄調元以歲貢謁選得建寧教授欲不行語先生曰休矣時勢如此以身試險毋寧老死橫陽山耳先生歎曰大丈夫當烈烈轟轟以身許國兄迴輪而弟叱馭各行其志毋相強也遂行既抵羅江值歲荒旱設法賑濟民賴以存活初羅江民不知水利旱則坐待天雨先生至教民爲堤堰蓄水又教以龍骨車筒車轉水諸法民獲其利呼陳公車壬午聘爲四川同考官得張夬何其輝諸人皆蜀中名宿以才擢知潼川州未久卽殉難死僞鎮馬科者李自成別校也自秦閒道入蜀圍潼川先生旦

夕督兵民固守時川中郡縣多陷滅援絕城陷賊逼降先生忿罵賊將殺之潼川士民涕泣擁護賊亦重先生節不遽加害欲久困以屈之幽五顯祠內先生飲酒賦詩自若賊知終無降意欲絕其飲食先生一日遺書其子軒曰吾以身許國一死無他說矣作絕命詩二首從容自經死時十七年十月二十三日也士民啟戶視生氣凜然有白廣文者收其屍殯白馬廟未一月馬爲賊帥所磔何其輝載其柩歸新化其輝卽先生壬午分校所得士也方斂時於懷袖間得被拘示守者詩曰世局竟如此吾身安所逃未能誅鼠輩死亦等鴻毛俯仰慚天地君親恩兩違吏民休我惜已視死如歸蜀人哀之爲作梓州曲云蜀山何巽巽陳公節不靡蜀宇嗁枯桑思公堪斷腸先是先生攜其祖所蓄兩琴之官一夜琴鳴甚哀先生乃命長子囊琴歸未幾而難作筠心學士詩所云

三台縣志

卷十六

二十九

三台新民印刷公司代印

鐵山太守攜入蜀碧血潼川事顛覆鴟絃夜半泣孤忠如聽淒涼羽音曲者也先生事明史忠義傳失載見〔一統志〕湖廣通志國朝追諡節愍見欽定勝朝殉節錄詩謠均見沅湘耆舊集先生別號鐵山子三人世軾世轍世軒其季也

清

汪時 〔府志〕汪時安徽歙縣人任潼川府通判金川軍興委管西路喇嘛糧站乾隆三十八年喇嘛作亂變起倉卒時馭衆素嚴賊銜之潛蹤躡行刃及於背時罵賊以死幕友田舒綠表侄王鳴鏞皆一時從死殲及僕隸焉

袁啟駿 〔射洪縣志〕袁啟駿山東人咸豐十年官太和鎮通判聞滇匪竄蜀已由合江而上啟駿練團堵禦十一年春賊圍遂寧遣子慧率勇

援之正月十五日與賊力戰被害賊亦猖獗逼鎮城啟駿晝夜親巡嚴諭防堵賊以堅守難攻鑿道陷城民潰勢危啟駿仰天呼曰天乎吾民如此吾何生爲率其子婦男女次第盡節始引繩自盡賊見而釋之復甦瞋目罵曰朝廷何負汝等乃爲亂而害吾民乎吾不願見汝也可速殺我賊敬其忠不肯傷啟駿不得死奪賊佩刀自刎賊又止之以其意堅遣人舁出送還寨啟駿弗肯登賊棄之走鄉民泣告以後圖啟駿然之乃爲恢復計賊平後邑人以長子慧死節事請於朝崇祀昭忠祠